



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 8

**Russia-Ukraine rara tatembang ka dang arur ama bilemer: Putin**

**Archery World Cup: India tetsür team-i gold medal angu**



VOL. XXIII ISSUE NO. 207 (ADOK 207) DIMAPUR TENTONÜ (MONDAY) MONUPII (MAY) 11, 2026

₹ 5.00

## PM Narendra Modi-i totzü apayua amshitsü; hon malitsü ayongzükür

New Delhi, May 10, 2026

**(Agencies):** Middle East rara ajanga petrol aser diesel jenjang atutsü tsübutepba mapang ka nung Prime Minister Narendra Modi-i Deobarnü nübortem dang work-from-home inyakyim tenzükshitsü, totzü atsükba ajema akümtsü aser küm ka atema kiyimba sentong asoshi hon malitsü ayongzükogo.

Alima supply chain nung tetsükdaktsü ajurua lir, crude oil jenjang kanga tuogo aser rongsenketzüng tsütsü kechi tia ajurutsü memetet anungji linük foreign exchange kümzükba ayutsü atema sensotemi apayutsüla ta PM Modi-i ashi.

"Corona mapang asenoki kidang nungi mapa inyaktüsü tenzük, online meetings, video conferences aser ibala mesükba aika tenzük. Asenoki item inyakyim tasentem agizükba benshi" ta pai ashi.

"Tanü asenoki item inyakyim

tu tanaben tenzükshitsüla aser ibaji linük ajungtsü asoshi lir" ta Modi-isa ashi.

West Asia nung mepetmesü aser Strait of Hormuz nung tenokdangba ajanga crude oil barrel ka nung USD 70 aliba nungi USD 126 shi kümogo.

"Alima nung Petrol-diesel jenjang kanga tasak kümogo. Asenoki petrol-diesel alizükba nung foreign exchange endokba ajemdaktsüsüla aser ibaji petrol-diesel apayua atsükba ajanga asütsü" ta Modi-i ashi.

"Linük sensotemi senotsü mashii meindoktsüla kechiyong global energy jenjang atuba ajanga rongsenketzüng tsütsü timtem ajurua lir. Ni nübortem dang küm ka atema kiyimba sentongtem asoshi hon malitsü mepishir" ta PM Modi-isa metetdaktsü.

Sorkar aser industry osangtem ajanga Indian nung küm pezü shi lir külen totzü jenjang reprangshimtsü akok ta

jembiba mapang ka PM Modi-i iba osang metetdaktsüogo.

May 15 matongdang India nung petrol aser diesel jenjang atutsü akok kechiyong oil marketing companies-i takoksa jenti angur ta osang angazükür.

Indian Oil, Bharat Petroleum aser Hindustan Petroleum company temi ita ka nung Rs 30,000 crore shi akoksar ta osang ajanga ashi.

Alima crude oil jenjangtem nung tanga sorkar aser totzü company temi petrol litre ka nung Rs 24 aser diesel litre nung Rs 30 shi menoker aser iba ya consumers nem khuret magütsütsü atema lir.

Sorkari mulung agizükra petrol aser diesel litre shia nung Rs 4-5 shi teimba akümtsü aser domestic LPG cylinders nunga Rs 40-50 shi atutsü akok.

PM Modi-isa Deobarnü totzü kümdera amshitsü ashiba den edible oil ajemtsü aser

aluyimertem dang bendanglen nungi bener aruba chemical fertilizers kanga mamshitsü mepishia metetdaktsüogo.

"Kasa tebilemtsü ya edible oil nunga lir. Asenoki edible oil bener arutsü atema foreign currency amshir" ta pai ashi.

"Kilen shiai edible oil ajema amshira, iba ya linük ketasena meimba shilem tulu ka asütsü. Iba ajanga national treasury jenjang tajungba akümtsü aser kibong shia nung züngsem ajak health tajungba akümtsü" ta Modi-i ashi.

"India-i tangalen nungi agricultural imports aika bener arur aser fertilizers nung sen aika endoker. Anungji asenoki chemical fertilizers amshiba tesadang ka anentsüla aser natural farming asütsüla. Iba ajanga asenoki foreign currency endokba ajemtsü aser asen alutem kümzükba ayutsü" ta paisa metetdaktsü.

Middle East nung mapang

talangka mepetmesü aliba ajanga alima energy tebilemtsü tuluba kümogo.

Alima nung totzü 20% shi ka Strait of Hormuz ajanga bener süir aser mepetmesü ajanga iba tesem nung rongtem senzusenbong mesademi lir.

Iba tebilemtsü koktettsü atema Bangladesh-i fuel rationing aser Sri Lanka-i working days ajemogo saka tang tashi India nungbo totzü agi metokmeperi kecha mali dang arudar.

Iba tebilemtsü atema India-i LPG production anogoshia 36,000 tonnes aliba nungi 54,000 tonnes aküm aser Russia, US o West Africa nungi crude bener arutsü tenzük. Centre sorkari refineries dang 100% capacity nung inyaksü tetuyuba agüja inyaker ta ketdangsurtemi ashi.

Centre sorkarisa totzü jenjang atuba ajanga consumers tim metemdaktsüsü atema excise duties ajema kümduktsü.

## Assam Governor Acharya-i Himanta Sarma dang sorkar akümtsü jaok

Guwahati, May 10, 2026

**(Agencies):** Assam Governor Lakshman Prasad Acharya-i Deobarnü Chief Minister-elect Himanta Biswa Sarma dang taruba sorkar akümtsü jaokogo.

Iba ajanga Assam nung BJP-i aniba National Democratic Alliance (NDA) sorkar kümsük tasembenbuba akümtsü lenmang lapoker.

NDA lennirtemi Lok Bhavan nung Governor den ajuruteper aser idang parnoki alliance legislature party leader Sarma lenisüba kübok sorkar akümtsü kuli agütsü.

Iba nung ajemdaker Governor Acharya-i Sarma dang sorkar tasen akümtsü aser May 12 nü Guwahati nung pa aser Council of Ministers züngsemtem nem tezüngzüktep agidaktsüsü jaok.

Iba tezüngzüktep agiba sentong nung Prime Minister Narendra Modi, Union Home Minister Amit Shah, Defence Minister Rajnath Singh aser tanga Bharatiya Janata Party lennirtem adentsü imlar.

Tawa Assam Assembly elections nung NDA-i menden 126 nungi 102 nung takok angu. BJP-i menden 82 aser parnok den yariteper Asom Gana Parishad (AGP) o Bodoland People's Front (BPF)-i menden terer (10) nung takok angu.

Iba ajanga Assam nung NDA-

i kümsük asemben atongtepa sorkar akümtsü. 2016 küm taoba Chief Minister Sarbananda Sonowal lenisüba kübok Assam nung mezünguba NDA sorkar kümteta liasü.

Deobarnü BJP-i aniba National Democratic Alliance (NDA) nung leader asütsü atema Himanta Biswa Sarma shim.

Tanü Guwahati nung BJP legislature party senden amenba sülen Union Minister J. P. Nadda-i iba osang metetdaktsü. Iba senden nung Nadda-i central observer ka ama aden aser BJP MLA 8-i Sarma tenüng pusema nungit.

Iba senden nungsa Haryana Chief Minister Nayab Singh Saini-i co-observer ama shilem agi aser BJP den yariteper Asom Gana Parishad aser Bodoland People's Front-ia Sarma pusema nungitba ajanga pa NDA legislature party leader asütsü shimtet.

Tanü Raj Bhavan-i aodang Assam BJP president Dilip Saikia, Finance Minister Ajanta Neog dena BJP lennirtemi Sarma meina ao. Governor den senden nung Asom Gana Parishad president aser Assam minister Atul Bora aden.

Assam sorkar tezüngzüktep agiba sentongji May 12, 2026 nü Khanapara Veterinary College playground, Guwahati nung agitsü.

## Küm 60 sülen Tamil Nadu nung non-DMK, non-AIADMK sorkar kümogo



Chennai, May 10, 2026

**(Agencies):** Tamil Nadu nung yimtenren tapak tasen ka tenzükba Tamilaga Vettri Kazhagam (TVK) president C Joseph Vijay-i Chief Minister inyaktüsü tenzükogo.

Tamil Nadu nung küm 60 tsüngda tang mezüngbuba non-DMK, non-AIADMK sorkar ka kümogo.

Tanü Chief Minister inyaktüsü tezüngzüktep agiba sülen Vijay-i free electricity supply (up to 200 units) agütsütsü, women's protection force tentettsü aser district shia nung anti-drug squads tentettsü dak sendakba file tem sign süogo.

Vijay-isa IAS officers Dr P Senthilkumar aser G Laxmi Priya na Chief Secretaries to the Chief Minister inyaktüsü shimogo.

Jawaharlal Nehru indoor stadium nung CM Vijay-i mezüng atema o jembidang nübortem dang pai election nung nangzükba mapatem inyaktüsü atema mapang agüjang ta mepshi.

"Nenoki kü ket nung tebilemtsü khuret tulu agütsüogo. Kasa mapang ni

nenok dang mapang tera meshizükür. Ni ka khen ka ta ni nangzükba ajak inyaktüsü merangtsü. Ni nangzükbatem ajak inyaktüsü. Nenoki kü nem mapang agütsüra iba jagi ni teyari tulu angütsü. Iba ya nür sorkar lir" ta Vijay-i ashi.

Tamil Nadu sentsüh Rs 10 lakh crore shi lir aser ni state senotsü endokba amshiba indang white paper agütsütsü ta pai ashi.

"Ni nenok dang taoba mapang ashiba ama ni nübor sen nungi poisa ka nung danga mekongshitsü. Kü atema ibaji nungdak mali aser nenokia ibaji junga meteta lir. Ni aibelen masütsü aser ni ozü Council of Ministers nem-a aibelen mesüdaktsüsü. Nisung kari tim masüba inyaktüsü tebilemba lira, asenoki takok nguogo anungji iba tebilembaji nenok tekolok nungi yimlibilema agienang" ta Vijay-isa ashi.

"Ozü sorkar nung power centres aika malitsü. Idaki centre ka dang lir aser ibaji kü lenisüba kübok centre lir" ta paisa shisem.

"Ni chubar kibong nungi aruba nisung ka masü. Ni nenok

ama dang aser nenok rongnung ka, nür kibong rongnung nia züngsem ka lir. Nübertemi timtem aser mezüngmeshi ajuruaka nü den külemi noktakba atema kanga pelar" ta Vijay-isa metetdaktsü.

Ni tesüba nung ashiba ama ni tiyazü tenangzükba agia nenok mashioktsütsü ta paisa ashi.

"Tanü nungi tenzükür drug sobaliba azüoktsü atema nungdakba mapatem inyaktüsü. Asen tanurtemi iba khuret nungi kümzükba ayutsübaji asen sorkar tebilemtsü khuret lir. Ni law and order tiptema ayutsü aser nisung ajak kümzükba ayutsü" ta CM Vijay-isa ashi.

"Ni menütsürtem, kü nem timtem agütsür ajakji ozü külem nübortem lir. Kü medemertem mesüra tsükchirtem süang, nütsüng yongsük crore tiji ozü nübortem dang lir" ta paisa shisem.

Tanü Governor Rajendra Arlekar-i Vijay nem tezüngzüktep agidaktsü aser pa den par Cabinet züngsem teimba kati Tsüngrem tenüng nung tezüngzüktep agia liasü.

# Zashei Huire sür küm 30 ajungba bilemteta amung



*Phek nung May 9 nü Zashei Huire sür küm 30 ajungba bilemteta amungdang tangokba noksa ka yangi angur.*

**Dimapur, Monupii/May 10 (TYO):** Federal Government of Nagaland (FGN) nung taoba mapang tir inyaka alisang Zashei Huire sür küm 30 ajungba bilemteta May 9, 2026 nü GHS Auditorium, Phek village nung munga liasü.

Iba sentong ya Phek Village Council ajanga ayongzük, kong nisung 2,000 shi adenshia asür Zashei Huire nem akhum agüja liasü.

Shevohu Keyho, Tatar, FGN/NNC ajanga iba sentong nung asür Zashei Huire takum otsü lemsatop, aser MLA

Kuzholuzo (Azo) Nienu o jembir liasü.

Chakhesang Public Organization tir Vezuhu Keyho, Phek Area Public Organization tir Wepelo Mebou, Sano Vamuzo aser Bino Kenye nungeria iba sentong nung o jembi.

Sentong nung Niesucho Keyho menden liasü aser Thupuve Vero, chairman, Phek Village Council ajanga pela agizükba o jembi.

Pudusu Vero-i anir Chekredziimi Cultural Preservation Society ajanga Zashei Huire nem akhum agüja

ken ka aten aser Zalezo Vero aser medemer temia indigenous tune nung ken ka agi shilem agia liasü. Maneni Samaritan group-ia temeja ken ka aten.

Rev. Dr. Vezopa Tetseo, Pastor, Phek Town Baptist Church aser Rev. Kevengoi Sakha, Pastor, Lozaphuhu Baptist Church nati iba sentong nung sarasadem.

Iba sentong metenzükdang Zashei Huire's Graveyard, Phek Town nung naro inoktsüba mapang Rev. Vesito Venuh, Pastor, Phek Village Baptist Church-i anir sarasadema liasü.

# AR-i Phek aser Tuensang nung Mother's Day amung

**Dimapur, Monupii/May 10 (TYO):** Assam Rifles temi May ita tanabuba hopta Assam Rifles Public School, Phek aser Assam Rifles High School, Tuensang nung Mother's Day munga liasü.

Tetsü aser caregivers akumtsübotsü, tenüngsang aser tepela sayutsü tangatetba temaba jenjangi ajungkettsü nükjidong nung iba sentong ya ayongzüka liasü, kong kaketshir, tesayur aser tsüraburtem tejangraba tulu nung dena liasü.

Iba mapang kaketshir temi o jembiba, greeting card yangluba, sobaliba yimya balala

nung shilem agiba, jilushi amala inyakyim nung shilem agia tetsü temi kibong aser lokti asoshi mapa tajung inyakba tushia liasü.

Kaketshir temi yimya balala amshia parnok dak sempet tajung aliba sayua liasü. Iba den tesayur aser tsürabur tem tsüngta Balloon Writing Game aser arr atsütepba lia pelatepba den shilem agirtem tsüngta telungjem tali adokdaktsü.

Iba sülen pei teinyaktsü aser teamwork angatetdakja kaketshir temi school mürekmejuba mapa inyaka liasü.



*TOAHDCC Senior Citizens Fellowship pur Mother's Day sentong ECH Chapel Hall, Indisen Village nung agia liasü. Iba sentong nung tetsü tem nem akhum agütsütsü asoshi teintet rogotem aser kinungertem arua aden. Iba sentong nung Takushilu Lkr menden liasü, Tzusa Imchen-i ken ka aten aser Temsunungsang-i anir tetsütem asoshi sarasademja sempet lema agütsü. Pastor Sunep Emkong, Set Free Church, Sovima Village ajanga Tsüngrem o jembi aser sentong temer süngojema liasü.*

# State nung 2nd Quarter National Lok Adalat takok ngua agiogo



**Dimapur, Monupii/May 10 (TYO):** Nagaland State Legal Services Authority (NSLSA) kübok District Legal Services Authorities (DLSAs) ajanga May 9, 2026 nü district headquarters nung benches 11 amenoka 2nd Quarter National Lok Adalat ayongzükdang ken o 402 benoka jembi aser sen 3,66,21,476 indang ken o 220 benteta liasü.

Nagaland nung Honibarnü National Lok Adalat ayongzükba nung ken o bentetba ya shilem 54 shi liasü. Iba mapang bank recovery, loan recovery aser telephone bills amala, criminal compoundable offences, MACT aser danga civil cases tem benteta liasü.

**MOKOKCHUNG :** Mokokchung District Legal Services Authority ajanga 2nd Quarter National Lok Adalat ya District Court Complex nung agia liasü.

Iba sentong nung presiding officer ya Victo Sema, NJS, District and Sessions Judge cum Chairman, MDLSA liasü aser panel lawyers Molodongba, Temjenkokla, Mapujungla aser Chubarenla nungertem conciliators liasü.

Iba mapang pre-litigation bank recovery ken o 10 benoka jembir sen 16,44,000 jenjang ken o ti tembanga liasü.

**PEREN :**Peren DLSA ajanga iba sentong ya SBI

Peren Branch nung ayongzük, kong presiding officer Khrievono Seletsu, NJS, Chief Judicial Magistrate Cum Secretary PDLA liasü.

Iba mapang parnoki pre-litigation bank recovery cases 50 benoka jembi aser sen 20,44,500 jenjang ken o 24 bentettsü.

**KOHIMA :** Kohima DLSA-i 2nd Quarter National Lok Adalat ya District Court Complex nung agi. Iba sentong nung presiding officer Principal District & Sessions Judge-cum-Chairperson KDLSA, Mezivolu T Therieh, NJS liasü.

Retainer Lawyer Sunjib Rana, Nagali Shohe, Tiakumla, Puchole, Yangpila, aser panel lawyer K.Catherine nungertem conciliators ama liasü.

Sentong tenzükba Mezivolu T Therieh ajanga jembi, kong bank ketdangsür aser department balala nungi ketdangsür aser teyari agirtem dena liasü.

Retainer Lawyer Sunjib Rana-i Lok Adalat agidang timtem ajuruba aser tarutsü nung tajungba nung agitetsü asoshi mera balala lemsatop. Iba mapang ken o 156 benoka jembi - pre-litigation 123 aser pending asem - aser sen 17,22,048 jenjang ken o 23 tembanga liasü.

**MON :** Mon DLSA ajanga 2nd Quarterly National Lok Adalat ya District Court Mon

nung presiding officer Nokshei Kano, District and Sessions Judge cum Chairman DLSA Mon aser Wokono Yhoshii, Chief Judicial Magistrate cum Secretary DLSA Mon lenisüba nung agia liasü.

Advocate Topha Panel Lawyer DLSA MON, Advocate Angun Konyak, Retainer Lawyer Mon DLSA, Advocate Mannon Chief LADC Mon, Advocate Moba Deputy LADC Mon aser Henlem P, Panel Lawyer Mon DLSA nungertem conciliators ama inyak.

Iba mapang pre-litigation bank recovery ken o ter aser litigation ken o ti benoka jembir sen 20,57,540 jenjang ken o tenet tembanga liasü.

**TUENSANG :** Tuensang District Legal Services Authority ajanga 2nd Quarterly National Lok Adalat ya District Court Complex, Tuensang nung ayongzüka liasü. Iba sentong ya Principal District and Sessions Judge cum Chairman Tuensang, DLSA, Somet Chumden Chang, NJS lenisüba nung agi, kong conciliators ama Retainer Lawyer, TDLSA, P.Herola aser Ayangla, Panel Lawyer liasü aser Panglang, Deputy LADC aser Thondi Ongphang, Assistant LADC nati yaritep.

Parnoki bank recovery cases 15 benoka jembir sen

14,78,629 jenjang ken o asem benteta liasü.

**WOKHA :** Wokha District Legal Services Authority (WDLA) ajanga National Lok Adalat sentong District Court Complex Wokha nung ayongzüka agi, kong presiding officer Seyielenuo Mezhu, District & Sessions Judge / Chairperson WDLA liasü.

Iba mapang parnoki sen 3,32,000 jenjang pre-litigation bank recovery cases ana benoka jembi aser anaprong tembanga liasü.

**PEHK :** Phek DLSA ajanga 2nd Quarterly National Lok Adalat ya District Court Complex, Phek nung ayongzük. Iba sentong nung presiding officer Duvelu Vero, NJS, District & Sessions Judge cum Chairperson Phek DLSA aser conciliator ama Sekhotso Rokha, Retainer Lawyer Phek DLSA, Vethothi Vero Chief LADC aser Thomeweu Panel Lawyer Phek DLSA liasü, kong Para Legal Volunteers (PLVs) temi yaritepa liasü.

Parnoki sen 49,55,778 jenjang bank recovery cases (pre-litigation cases) 27 benok aser ken o ajak tatem kuma liasü.

**KIPHIRE :** Kiphire District Legal Services Authority ajanga Honibarnü State Bank of India, Pungro Town nung mobile Lok Adalat ayongzüka liasü. Iba sentong nung presiding officer ya Holika Sukhalu, Chief Judicial Magistrate cum Secretary, Kiphire DLSA liasü.

Chief LADC, Ayiala Inti aser Deputy LADC Lizi Sangtam na conciliators liasü aser Pungro PLVs temi yaritep.

Parnoki Pre-litigation bank loan recovery cases 13 benoka jembi aser sen 17,31,200

jenjang ken o 11 tembanga liasü.

**DIMAPUR :** Dimapur District Legal Services Authority (DDLSA) ajanga 2nd National Lok Adalat ya District Court, Dimapur nung ayongzüka agi. Iba sentong nung presiding officer N. Longshithung Ezung, NJS aser Secretary Atoka Achumi, NJS liasü.

Iba mapang parnoki sen 46,01,223 jenjang bank recovery ken o 60, BSNL dak sendakba sen 37,988 (pre litigation) indang ken o 36 tashi bentetja liasü. Parnoki MACT dak sendakba sen 53,30,000 indang ken o trok bentettsü.

**ZUNHEBOTO :** Zunheboto DLSA ajanga 2nd Quarterly National Lok Adalat ya District Court Complex, Zunheboto nung District and Sessions Judge cum Chairman ZDLSA, Phuleto Yeptho, NJS lenisüba nung agia liasü.

Iba sentong nung conciliator Easter H Yepthomi aser Vilibo K. Zhimo liasü aser parnoki pre litigation bank recovery cases ti benoka jembir sen 23,67,922 indang ken o tenet bentettsü.

**LONGLENG :** Longleng DLSA ajanga 2nd Quarter National Lok Adalat ya Kumdilong Kessen, NJS, Chief Judicial Magistrate-cum-Secretary, LDLSA lenisüba kübok District Court Complex, Longleng nung agia liasü.

Iba sentong nung conciliators ya Joseph Phom, Assistant Defence Counsel, DLSA, K. Bongyei Phom, Retainer Lawyer, Yingloi, PL aser Akongla, PL liasü.

Parnoki pre-litigation ken o trok aser pending litigation ken o ka benoka jembir sen 83,18,648 indang ken o trok benteta liasü.

# Tamil Nadu nung Vijay-i Chief Minister tenangzükba agiogo



**PWD**

May 10, 2026 nü Chennai nung Tamil Nadu Angh, Rajendra Arlekar-i ketdangsüa Tamilaga Vettri Kazhagam (TVK) party tongti, C Joseph Vijay nem Chief Minister tenangzükba agidaksütsü lia tangokba noksa nung angur.

**Chennai, Monupii/May 10 (Agencies):** Amongnü Chennai nung Tamilaga Vettri Kazhagam (TVK) tongti lenir, Joseph Vijay-i Tamil Nadu Chief Minister tenangzükba agiogo.

Tenangzükba agiba sentongji Jawaharlal Nehru Indoor Stadium nung agi.

Tamil Nadu Angh, Rajendra Arlekar-i ketdangsüa C Joseph Vijay nem Chief Minister tenangzükba agidaksütsü.

Angh-i Vijay dang May 13 anogo matongdangsa state assembly nung nübo peria aliba (majority) sayuang, ta tuyuogo.

Honibar aonung Vijay-i Angh ajurua sorkar akümtsü atema Congress, CPI, Communist Party of India (Marxist) [CPI(M)], VCK aser IUML-i pa pusemba shidi agüja liasü.

Tawa assembly election nung TVK-i menden 108 nung takok ngua liasü aser party aikati parnok pusemba ajanga

züngsem 234 aliba assembly nung parnok MLA 120 kümogo. Single largest party ji TVK liasü ajüsüaka tangar teyari magii parnok sasa sorkar akümtsüsa parnoki simple majority menguteti liasü.

Congress MLA pongui tama TVK pusemtsü telemtetba agi, iba sülen VCK, Communist Party of India (CPI), Communist Party of India (Marxist) aser IUML party temia TVK yaritsü metetdakja liasü.

TVK-i menden 108 tashi nung takok angu, ajüsüaka Vijay-i takok anguba menden ana nungi menden kabo toktsütsüsa akümtsü, anungji parnok menden 107 dang asütsü.

TVK MLA 107, Congress 5, VCK 2, CPI 2, CPM aser IUML MLA 2 lir (ajak senteper 120). Vijay-i menden ana nungi toktepa menden anaprongla nungji takok nguogo, anungji pai menden kabo toktsütsüsa akümtsü.

Amongnü sorkar tenangzükba agiba sentong nungji Lok Sabha nung Opposition lenir Rahul Gandhi den party balala nungi lenirtem aika liasü. Iba dak alia Trisha Krishnan densema film actors, industrialists aser linük tesem balala nungi tongti ketdangsertema aika aden.

Osang angazükba agi, Vijay-i Home, Police aser Public Administration densema tongtibang portfolio aika abentsü.

Vijay dak alia TVK lenir 9-N Anand, Aadhav Arjuna, KA Sengottaiyan, KG Arunraj, P Venkataramanan, R Nirmalkumar, Rajmohan, TK Prabhu aser S Keerthana nungeria minister tenangzükba agiogo.

Actor nungi yimatenren nung ajemoksang, Vijay-i küm ana tejaklen TVK party ya tenteta liasü aser tang mezüing assembly election nung toktepa takok tulu nguogo.

# Kerala nung INTUC-i totzü jenjang atuba anema longkak aittsü

**New Delhi, May 10 (Agencies):** Hombarnü INTUC Kerala unit-i state tesem ajaklen gari totzü aser gas jenjang atuba anema longkak aittsü.

Indian National Trade Union Congress (INTUC)-i sangdong ka ajanga, home LPG cylinder aser commercial cooking gas jenjang kanga tuogo, aser ibaji ajanga state nung aliba hotels aser business kanga mejungi kongshio, ta metetdaksü.

INTUC Kerala state Tir, R Chandrasekharan-i, petrol/diesel totzü aser gas jenjang kanga atuba ajanga mapa inyakertem mapa makai akümer aser company/industry aika shibangtsüsa tensa ka nung lir, ta metetdaksü.

Trade union lenirisa, aayangtsü maangka makai akümba agi state-i arua aayanger bendangertema aikati state toktsür odar, ta

metetdaksü. Chandrasekharan-isa, petrol aser diesel jenjang atuba agi chiyungtsü aser mozü jenjanga kanga tuogo, aser ibaji ajanga nüburtem khuret tuluba dang akümer, ta ashi.

INTUC district committees tetuyuba nung district 14 prongla nung longkak aittsü.

May 11 nü Central sorkar office tem nunga longkak aittsü, ta parnokisa metetdaksü.



May 10, 2026 nü Chennai nung tzünglu tarudak mapang gari senzüsembongba noksa nung angur.

# Intelligence osang nung ajemdaker Delhi nung security akangshir

**New Delhi, May 10 (Agencies):** Intelligence osang ka ajanga kiralongrartemi Delhi tesem balala amaksüa akok, ta metetdaksüba sülen Delhi nung BJP Headquarters densema tongtibang tesem aika nung security akangshio.

Police dang kanga yakyaka alitsü tuyuba den külemi kibur maliba osettem aser anena aliba garitem mita repringtsü tuyuogo, ta osang ka ajanga metetdaksü.

Delhi nung kiralongrartemi lokti kanga longsoa aliba tesemtem aser tongtibang office tem amaksü akok, ta security agencies nem intelligence osang metetdaksügo.

Kiralongrartem jagi pei mang nung bomb alenloker

pokdaksütsü akok, gari nung improvised explosive devices (IEDs) pokdaksütsüa akok mesüra prangpong amshia amaksüa akok, ta kasa osang ajanga metetdaksü.

Delhi nung talisa ruling Bharatiya Janata Party (BJP) indang headquarters aser anasa aliba sorkar office tem nung security akangshia police aser seuciry sepai tali lemezüksüogo.

Iba dak alia sepaitemi party balala office, shishilembadak, bus/train stations aser lokti aliba tesemtem mita ao tenzükogo.

Yaküm November 10 nü Red Fort anasa gari telung nung bomb pokdaksüba lendong nung nisung 15 aser nisung dak tali yirua liasü.

# Petrol, diesel aser gas kanga kümdanga amshitsüla: PM Modi



May 10, 2026 nü Hyderabad nung sen crore 9,400 jenjang projects tenzüksüba sentong nung Ato kilonser, Narendar Modi den tangartem angur.

**New Delhi, May 10 (Agencies):** Amongnü Ato kilonser Narendra Modi-i nüburtem dang petrol, diesel aser gas kanga kümdanga amshitsü mepishi.

Totsü atema asenoki tangar dak metalokba ajema akümba ajanga tang rara aliba ajanga India kongshiba ajema akümba nung yaritsü, ta pai ashi.

Telangana nung sen crore 9,400 jenjang project balala tenzüksüba sülen Hyderabad nung lokti den jembidang Modi-i, petroleum products kanga meyaka amshitsüji linük atema nüngdaka kümogo, ta ashi.

"Tanübo petrol, gas aser diesel kanga meyaka amshitsü nüngdaka kümogo. Asenoki bendanglen nungi bener aruba petro products ya nüngdak nung dang amshitsüla. Ibaji ajanga asenoki senotsü kümzükba dang masü saka rara ajanga kongshiba-a ajema akümtsü," ta Ato kilonseri metetdaksü.

Energy security dak sendakba nung pai, "Energy security ya kechiba tongtibang? Tanü alima nung nisung ajaki ibaji meteta akümer. Ibayongji Central sorkari India nunger energy security atema sen kanga indoker. Tesüiba küm ishika tsüngda alima nung solar power sector nung India ya temaba linüktem rongnung densema lir," ta ashi. Paisa, Centre-i mezüing universal LPG coverage atema

inyak aser tangbo jenjang dalang agi piped gas supply agütsütsü aser CNG-based transport systems ajungkettsütsü atema inyaker, ta metetdaksü.

Item telemtetba agia inyakba ajanga tang alima nung energy tsütsü timtem aliba mapang nung India bo tim-matemer, ta pai ashi.

Amongnü Telangana nung tenzüksüba projects rongnung gari lenmang, railway, petroleum aser textile infrastructure densema lir. Tongti projects rongnung Hyderabad-Panaji Economic Corridor kübok Gudebellur aser Mahabubnagar na tsüngda National Highway-167 four-lane aser Sangareddy district kübok Zaheerabad Industrial Area nung infrastructure terenlok projects densema lir.

Ato kilonser Modi-isa Hyderabad nung Kazipet-Vijayawada railway multi-tracking project, Kazipet Rail Under Rail bypass aser Warangal nung PM MITRA Park semzüksüogo.

Iba Textile Park ya sen crore 1,700 shi indoka yanglu.

Project balala tenzüksüba aser semzüksüba sentong nungji Telangana Angh Jishnu Dev Varma, Chief Minister A Revanth Reddy, Union minister G Kishan Reddy aser union minister Bandi Sanjay Kumar nunger liasü.



# TIR YIMYIM

## YIMOBILEM (EDITORIAL)

DIMAPUR MONDAY, MAY (MONUPII) 11, 2026

### Kiset shiruru taküm menoktsür

**A**senok ya shi achir kin aser asenok dak tajung kaji, asenok ajaki kidang ak an metsür, anungji iba jagi kibong nungdak nung kanga yarir aser senotsüa kümzüker. Ano asen loktiliba nung kibong shia ak, an aser nashi, nabong metsütsüba asenok sobaliba lir, kechiyong ajungben asü ama lendong aser nungdak mapang asen kidang metsüa aliba kiset shirurtem takümü agitsüsa akümer, anungji sentsü tuluka metsüi item dakji atsüngloker. Ano, tsüraburtemi takzüba kaji, kibong nung asen dak tamajung ataloktsü aliba timtem aser lendonga kidang metsüa aliba kiset shirurtem kaor aser asenok kümzüker. Aji oda, aiben asenok kibong nung shilumanem aliba mapanga ajungbena asen kidang aliba kiset shiruru süadokra, ibaji asen melen bener oa adoker ta tanü tashi asenoki jembir. Itemji tenük agi manguba sobaliba tamang, anungji itemji asenokibo mangatetsü saka aitsütsülaa masü. Ajisüaka, tanübo asenoka asen kidang dang masü saka ki nungi pilar senotsü ajangzüksü nükjidong nung kiset shiruruji aika puoka yur metsür. Atangji, asen lima nung tesasatsüka, nashi nabong aser jang metsürtem kanga ajema kümogo, ibayongji shi aser mamatzü tangalen nungiang bener arutsüsa akümer. Ajisüaka, ano tajung kaji, tesem balala nung akhidang nungi metsürtemi sü metsüba ya parnok sobaliba kuma metsüdagi aser sü yabo jenjang tulu asünungji senotsü tsütsüa kanga ajangzüker. Aji oda, asenok asoshi kiset shiruru metsüba mapatem ya tsük lu ayimba ama sobalidak dak aketba aluyimba mapa ka lir, anungji tanü putu dak apet, asen nungdak danga peritsüsa ak, an, nashi aser nabong metsütsü metetsüba kanga tongtibang kümogo. Ajisüaka, item temetetsü aser teinyaktsü nungdaktemji kari meshira aser mesayura, nübortemi kodaser angatetsü (?), anungji kiset shiruru wara tapu balala nungi kümzüka metsütetba inyakyim aser lenmangji Animal Husbandry aser Veterinary department nung inyakertemi sayutsüba taoba mapangtem dang nungibo tangsa tenungdakba kümogo. Tangbo ano kiset shiruru metsürtem asoshi mulung anisüngzük osang kaji, pei metsüba kiset shiruru wara nungi mejenbutet asü nungbo government-iba menokji agütsütsü asoshi National Livestock Mission kübok Livestock Insurance scheme lir, anungji iba ama sentong alibaji shiruru metsürtem nemji metetdakja aotsüba kanga tongtibang mapa ka asütsü. Iba ama sentong ka yakanü Khar yimtak agiba angashiogo aser maneni nübortem nem tangatetba agütsüba sentongji yimtsüng aser town shia oa ashitsü nungdaker. Ano, tanü asungbo ketdangser aser tesayurtem tsüngdong maoyonga osangkaket aser social media ajanga Naga nungter tetsü oshi balala nung meyipzüker adoktsütsü aser sangdongtsüba mapa temelatiba ka kümogo. Aji oda, kiset shiruru metsütsüba Naga nungter sobaliba, anungji kibong shiai metsür saka tarendaktsü aser tejashitsü kaji tashidak wara arur shirurtemji, tapayutsüka, ajak süa adoker. Atangji, ak an wara nungi mejenbutetbaji tila asüdang mozü shitak magütsüba agia masütsüa akok mesüra keyi mozü magütsüba agia masütsüa akok, anungji akok tashi tila asüdang mozü shitak agütsütsü nenshia sayuba den ano tashidak nungi kümzüka alitsü asoshi Veterinary department nung inyakertemi akok tashi lenmang sayutsüba kanga tongtibang kümogo. Asenoki shirurubo metsüner saka wara arua agi asü tsübuba agi memetsür aser shitakba aiben ajungbena wara aruagi an aser akbo remoka süadoker. Ibaji shiruru metsür aluyimertem asoshi kangasa takoksa lir. Iba ama tetsüba aser tarendakji samadaktsür, nübortemi ano asentenshia kiset shiruru metsüba mapatem dangi meyiptsüba, tang, shiruru insure süa ayutsü asoshi sentong yanglua tenzükbaji asütsü. Anungji, menua melii Animal & Veterinary department ajanga kiset shirurtem rongnung insure asütsüba nashi, ak, an, san, nabong aser jang-tem süra, itemji kechi koda, kong aser koma register asütsü, ibaji nübortem dang sangdongtsü junger. Iba Livestock Insurance sentong yagi asenok kiset shiruru metsüba mapa nung asentenshi tulu adoktsü.

# OLEMSABANG

## SHILUNOKTAK - TAOCHI AENLENMANG

~ O. Tongpang Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

Tapu ka

### Tammang nung tangula

Takok nung masü saka nüktzüji pei sobutsü kümer Taochibenla pei taküm aenlenmang (journey) aposo. Tema nungbo kanga dang tabensa ta ashitsüsa kibong ka nungi tebu, tetsü aser parnok tanur asem liasü. Saka telung nungbo yipru ka agi lar kibong anakshi.

Kodang la küm 10 liasü, tangari nungnunga jembiba o ka lai angashi, koba agi tensa ajak balaka kümdaktsü. Shitakba agi tanur kati yamala oji kangabo süoki ia meyui odang toktsütsüba sünung laibo kanga kuoka la mulung nung ayu. Tebu tangar tetsür ka den tenük tasen adok. Kobi meli-i kibong telungzük atena oa sayatenyaba ajangaji jungkai adoka kitachir ka aso.

Lar kibong nung iba ochi jungkai adokbaji tsüngi ailoktsür ama atentenba lai mapang shia bilemtet. Lai ojala tanela aser shi ajak nung anogoshia iba taku, tayangba aser ashioktsüba ajanga nunga ajeba angu-aji oda süaka iba tai makaba tanur lar kibong nung aniok. Tetsüi parnok balalulaba chirtem mekümdaktsünübayong aremzüker odang iba tanur kanga meima ali. Lai teti la mulung nung yamai ashi, "Tebo, na tai makaba tanur, ni na kodanga tesemba mim tamajung agi mekülakokdaktsütsü." Joko tang lar kibong nung iba tanubosang dena tanur pezü aküm.

Iba mapang Taochibenla küm 10 dang asünung kechiba ojalai yamai temeim inyaker iba ainji lai mangateti liasü. Lai ayimoktsünüa ait, sempa-a bilem, tebu külakoktsüba süngjang atangba tamaitüsü iba tanur ya asünung meintoknüa liasü. Saka ojala sayubentsü o tanep la mulung nung teti ayu. Adangji ibai ojala shisatsü dak alia oa jembiba, kechiyong la dak Tsüngremer tashi ain ka liasü.

Tapu ana

### Mulungmeso remadokba aser kakat

Iba jungkai adoker külen taküm libalirua aotsüji melara mesüi aküm. Tetsüi iba tia nungji azüitaka kishizüng nung la ajeba nüktzü kodanga makong. Aser Abenlaia küm nung tanur asünung iba khuret lasasa mekoki liasü. Lai langkaka nung atsüktsü kanga nungdaka aküm. Lai meyoktsü asoshi amokmerenba mulungmesoji kong ali tur aremstü ta kanga züak ta ia bilemli asü. Item tia nung la mulung konganga mayu aküm. Saka tejashi ajakji lai kakat zünga lesson bushiba nung samadaktsütsü merang. Tangar mejangdang lai saaka amen. Lai azüng, kakat zülü, aser sarasadem - hauni, lai Tsüngrem den teti jembiba. Aiben lai tangula agi, "Kibur, Nai ni ngura, ni ajangketang. Nai ni meimra, ni amshiangma."

Azüngtsü aser bushitsüji la jenokdak aküm. Tapaktemji la jara aküm koba agi lar kidang paipalem nungi jenbudaktsü. Khenkhenbo lai odang school-a mezüngi toktsütsü ta-a bilemasa aru. Teraksa aser tammang kibong ka nungji lai shingai mangur ta-a bilemli asü. Saka Tsüngremibo iba tammang dakji sentsüpranglung (diamond) yanglutsü lenmang patettsü. Pai la nem temaba shisatsü moatsü, aser mangdang tulutiba yutetdaktsü, koba agi la tangu/tayangba dang nungi tulutiba tasüitdaktsü.

Meilongi, tammang nungji tesangwa agi ateta atsüng meso. Lar class nung la tematiba jenjang nung B.Sc renemtet. Iba sülen Scholarship anidaka aru. Idangji ano lai khenyongi yimdangia maruba maongkatem ka khen ka khen ta ajuru, lokti nung shilem agiba, classroom nung tasa balala atongba, shitipak nung shisaben balala inyakba, kong Tsüngremer taochi aser lar otsü lemsateptsü sabang tajung liasü. Aji oda süaka, item ajak nungji lai lar kibong teraksa agi la mulungjang ayangba tarak ano muoi liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

## India nung National Federation of Churches in India (NFCI) tentet



May 08, 2026 nü Bengaluru nung aliba St. John's National Academy of Health Sciences (SJNAHS) nung 4buba National Ecumenical Bishops' Fellowship senden nung adenertem tangokba noksa nung angur.

**Bengaluru, Monupii/May 10 (Agencies):** India tesem balala nung Khristantem anema inyakba kanga bulua akümba, state aika nung anti-conversion ozüing tesashiba yangluba aser Tenla ki densema Arogo kiojen raksatsüba anema Khristantemi longjemer ola adoktsü nükjidadong nung National Federation of Churches in India (NFCI) tentetogo.

May 08, 2026 nü Bengaluru nung aliba St. John's National Academy of Health Sciences (SJNAHS) nung 4buba National Ecumenical Bishops' Fellowship senden aliba mapang nung denominations balalai NFCI ya tentet.

Tang linük nung pastor tem aser tamangertem anema inyakba kanga bulua akümba, FCRA ozüing yanglushiba aser Christian Welfare/Property Board ka tentettsü benokba mapang nung NFCI ya tenteter.

Tesüiba küm ana tashi o lemtepa aruba aser telatetbatem yangluba sülen May 8 nü NFCI ya tenteter. Iba senden nung putirtem, Arogo nung tekolakpurtem aser Khristan denominations balala nungi lenirtemi telatetbatemji agizüka NFCI tentet.

NFCI-i longjemer Khristantem atema ola adoktsü aser Arogotem tsüingda amalitepa inyakba

ajungkettsütsü.

May 8 nü senden nungji lenir 45 shi aden. Hyderabad nung archbishop aser CBCI Tir, Anthony Poola-i lokti pelaa agizük aser CBCI Office for Dialogue Chairman, Mar Joseph Kallarangatt-i Khristantem longjemtsü atema tayongzükba agüja liasü.

Iba sülen Good Shepherd Church in India nung pastor, Joseph D'Souza leniba nung o lemtepa liasü.

NFCI nung Chairman ji Anthony Poola asütsü aser Convenor asemji Archbishop Joseph D'Souza, Bishop Joseph Kallarangatt aser Bishop Vincent Vinod Kumar nung asütsü.

## China nung Khristan missionary temotsü film ka sayatsü

**May 10, 2026:** Khristan missionary temi kanga tasü itta China nung Khrista osangtajung prokba indang film ka yanglutsü.

Tawa osangbenertem den jembidang Director Matt Mikalatos-i, "Hudson & Maria," film ji Khristan missionary apuani- Hudson aser Maria Taylor nati 1800s mapang nung China nung Khrista osangtajung prokba indang otsü lir, ta metetdaksü.

"Hudson & Maria film ya Aso 19buba mapang China nung Opium Wars tensa mapang nungi tenzükba otsü lir. England nung missionary Hudson Taylor-i China nung oshi, sobaliba aser sübosolemtsü agia China telung nung Tsüingrem temeim lemsateptsü tenzük. Pa den külemi pa kinüngtsü tasütait Maria aser China nung medemer Wang Laijun ajanga sobaliba balala sendakteptsü," ta Mikalatos-i metetdaksü.

"Parnok ajak longjemer timtem balala aika aser tesendaktep yanglur. Iba otsü ya tamang, tenla agütsüba aser sobaliba balala sendaktepba otsü ka lir," ta pai ashi.

Iba film ya Half Crown Media-i Burns & Co. Entertainment den senteper produce asütsü. Taküm August ita nungi tenzükba Asia nung iba film tangoktsü.

Osangbener den jembidang Mikalatos-i, "Hudson & Maria" film ajanga Hudson Taylor aser Maria Taylor na tamang jenjang, tenla agütsüba aser Khrista osangtajung proktsü atema tena dak tejangraba tulu aliba otsü ashitsü, ta ashi.

Paisa, missionary apuani na jagi 1800s mapang China nung temzüing alema inyak aser iba linük nung mission milak janrudaktsü, ta metetdaksü.

"Nisung aikati Hudson ya 'modern missions', talisa Protestant Missions tebuti lir ta züingshir, kechiyong 'Kechiba onoki China ama tesemtemi oa parnoki Khrista magizükdang tamasa asen sobaliba bentshitsüla ta parnok dang imlatsü?' ta mezüing jembisangji pa lir," ta Mikalatos-i metetdaksü.

"Anungji pai pa China nung ama aküm, pai China nung süoshi asem, par oshi angazük aser China nung ka

ama China nung Khrista osangtajung lemsatet. Tangbo iba inyakyim ya Evangelical aser Protestant missions atema inyakyim ka kümogo," ta pai ashi.

"Hudson & Maria" film ajanga Hudson aser Maria Taylor nati Tsüingrem tenzüktsü jangraba aser taküm aika melenshidaktsütsü atema taküm bendanga agütsüba otsü ashitsü.

Film Director, Mikalatos-a taoba mapang missionary liasü. Iba film otsü ajanga akhidang ama tanü lima nunga tetsüba, tensa mesüingjemetba aser tarütsü tia mejangjaba medemdangtsü, ta pai ashi.

"Taoba mapang nunga alima nung tensa mesüingjemeti tanü amai liasü. Tawa asenoki ajangshiba wara (coronavirus) amai taoba mapang nunga tashidak balala liasü, aser nisung aika ratamataa liasü," ta pai ashi.

"Iba ama tensa mapang ka nungji arrshi küm 21 missionary aser pa kinüngtsü nati iba tensaji meteta dang liasü, ajisüaka Khrista atema parnoki inyak aser taküm bendanga agütsütsü melungteta liasü," ta paisa metetdaksü.

## ANOGO ABEN TSÜNGREM DEN

## Nuso Ashiba

*Saka item ajak tekangshitsü tetenzüker*

*Mathi 24:8*

Khrista kodang meyiba arütsü? Putu ajak nung iba tasüingdangba kanga shisadanger. Khrista tangsa arütsü ta bilemba agi Khristani inyakba ajak tesülen atsüingzüktsür. Khristai Pa kodang arütsü mapang shidakji mashi saka saksalema alitsü taitsütembo pai ashi. Mapangji mejangja saka Pa arütsüji tejanga.

Tatalokba kar ajanga Pa arütsü mapang anasa lir ta sayütsü ta Yisui ashi. Idakji raraba aser raraba osang alitsü; ayawara aser menoknok alitsü; Khrista asoshi Khristantem rishikangshitsü; tiyazü ainkar arütsü aser tiyazü sayütsü, aika mashileni anitsü; ozüing raksar jenti adoktsü, nisungtemi pei nükdang kechi tajung aji inyaktsü, yimsüba menden nung alirtemi ozüing raksartem azüoktsü makoktsü, temeim mokonga akümtsü (Matt. 24:6:-12).

Tatem mapangji nüsotsü tekangshi ama alitsü ta Yisui ashi. Tanur asoshi tashitsü atuba tali tali akümer, aser ibai maremtetti atur. Rara mesüra ayawara mesüra tiyazü tesayur adokba tetezü Pa aruba asenok den lir ta Yisui mashi. Itemji tetenzüker dang lir ta Pai ashi. Khrista maru tashi rara, menoknok aser ozüing raksartem tali tali adoktsü ta Pai ashi. Tatem nung Khrista arudang item ajakji tatem akümtsü. Rarartem, ayawara aser meimchir mepetmesü ajak tatebang kati arütsü.

Yisui jembiba ajak asenok mapang nung ngua arur. Yisu arütsü asoshi khristantem saksalema atatsü mapang ka süra ibaji tanü lir.

## Russia nung missionary pezü apuba sülen court-i senchi achi

**May 10, 2026:** April 29, 2026 nü Russia nung Khristan missionary pezü shia dang Russia nung Kirovsky district nung aliba peace court-i senchi Russia nung rubles 15,000 achi.

Ivan Moshechkov, Mikhail Dresvyannikov, Anton Gubernov aser Farhat Aitov nung ya International Union of Evangelical Baptist Christians nungi lir. Iba telok yagi sorkar kübok register asütsü memelunger.

Taküm February 22 nü sayütsüingir pezü jagi nija ki ka nung tekülem sentong ayongzuka agi. Tekülem tagidak mapang nung assistant prosecutor ka aser security officers asem aruba sülen tekülem metebang tashi kima ata-a liasü.

Tekülem sentong tembangba

sülen par pezüprongla apu.

Parnoki, iba kidangji nisung shinga malir, anungji yangji tekülem sentong agibaji ozüing alema lir ta metetdaksü.

Iba sülen Administrative Code nung Arrla 5.26, Part 4 kübok parnok anema ken o angadang. Iba Arrla ya Russia nungertemi ozüing alema missionary mapa inyakba indang lir.

Iba ozüing kübok aibelenertem dang senchi ruble sen 50,000 tashi achitsü akok aser linük nungia aridoktsü akok.

Taküm March ita nunga, pastor Vladimir Rytikov Russian-occupied region of Ukraine nungi aridoka liasü. Sorkar kübok register asütsü memelungba Baptist Coalition of Churches nung pastor inyakba agi pa aridoka liasü.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Yapuyanü**

(n) mejembitsü o jembia asayamenüba ( use of foul language in joke)

\* Telok nung yapuyanüa jembiba agi nisung aika jashidaktsür.

**Yar**

(v) jokshishia tsüngsangba (dance)

\* Moatsü sentong nung yar reprangi nisung aika aru.

**OLONG PAITEP # 7501**

1			2			3			4
			5		6		7		
8									
			9						
	10								
								11	12
			13				14		
15						16			

**TIPIEN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. \_\_\_ adenshi - (4)
- 14. Tsünüsenbongtsü adokdak - (3)

**OLONG PAITEP # 7500 TELANGZÜBA**

**TIPIEN :**

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER**



China nung Xuanyi Geng-i 3.71 seconds nung dang 3x3x3 rotating puzzle cube ka yangluteta alima otsü tasen ka yangluogo.

April 26, 2026 nü Huzhou, China nung Deqing Small & Special 2026 sentong nung geng-i iba otsü ya yangluteta liasü ta Guinness World Records-i metetdaksü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**NE state 4-i National Panchayat Awards 2025 agizüktsü**



**Guwahati, May 10, 2026**

(Agencies): Union Ministry of Panchayati Raj-i sangdongba National Panchayat Awards 2025 nung North East nungi panchayats-i sempet aika nguogo.

Assam, Tripura, Mizoram aser Sikkim nungi panchayat temi telemsa balala nung sempettem angur.

Taküm sempettem atema States aser Union Territories 17 nungi panchayats 47 shimtetogo. Parnok ya rural governance, sustainable development, sanitation, infrastructure aser grassroots leadership atema lir aser June 3, 2026 nü New Delhi nung

sempet agütsüba sentong agütsü.

Assam nung panchayat aseminational honours nguogo. New Napam Gaon Panchayat nem Nanaji Deshmukh Sarvottam Panchayat Satat Vikas Puraskar 2025 kübok Best Gram Panchayat agütsür aser iba atema Rs 1.5 crore senpet angutsü.

Maneni, Assam nungi Jumarmur Gaon Panchayat-i Deen Dayal Upadhyay Panchayat Satat Vikas Puraskar 2025 kübok Clean and Green Panchayat category nung tanabuba jenjang angu. Ano Hoogrijan Gaon Panchayat-ia Self-Sufficient Infrastructure category nung

tanabuba jenjang angu.

Tripura nungi Sepahijala nem Best District Panchayat agütsür aser iba asoshi parnoki tematiba senpet Rs 5 crore angutsü. Maneni, Kanchanbari-i Healthy Panchayat category nung mezüngbuba aser Women-Friendly Panchayat category nung Baikunthapur shim.

Mizoram nungi Kawrthah North-i Clean and Green Panchayat category nung mezüngbuba sempet aser Sikkim nungi Gyalshing Omchung-i Poverty-Free and Enhanced Livelihoods category nung tasembuba jenjang takok angu.

Item sempet ya panchayats ajitetsü aser Rashtriya Gram Swaraj Abhiyan kübok local governance, service delivery, sustainability aser community-led development maparen ajungmesotsü atema agütsür ta Ministry of Panchayati Raj-i metetdaksüogo.

**India-Bangladesh arrtsülen BSF-i shibelener 2 khaset**

**Agartala, May 10, 2026**

(Agencies): Border Security Force (BSF)-i Hokolbar aonung testü India-Bangladesh arrtsülen injang khaloktsüdang Bangladesh nung ka khaset ta Bangladesh media ajanga metetdaksüogo.

Iba ya Tripura kübok Sepahijala district nung atalok aser tasür anaji Md Morsalin (22) aser Nabir Hossain na ta jangaogoo.

Bangladesh den Kasba border anasa aliba Dhajanagar border area nung aonung 11:15 ako meta iba ya atalok ta

Bangladeshi media outlets-i ashi.

Bangladeshi senso 15 shi adenba telok ka shibelentsü maparen atema India lushi telungi ai aser parnok ya India nungeri yaritep ta Border Guard Bangladesh (BGB)-i ashi.

Iba telok ka khu bener meyipa arudang Pathariadwar camp nungi BSF 49th Battalion patrol team kati metet aser idangji injang khaloktsü ta BGB-isa ashi.

Iba telok nung Bangladesh nungeri aika yiru aser Comilla nung anepalutsü atema anir ao

ta osang ajanga ashi.

Kamalasagar border area nungi aonung 11:50 ako meta BSF-i injang khaloktsüdang asüba nisung ka dang Bishalgarh subdivisional hospital-i anir aru ta Tripura nungibo osang metetdaksüogo.

"Onoki BSF den mang meyipa bener arutsü atema jembitepdar" ta Lieutenant Colonel SM Shariful Islam-i Bangladesh media dang ashi.

Item nisungtem ya ozüng alema shibeleneritem liasü ta BGB-isa ashi.

**Assam-i US dangi ninang mojitzü 20 metric tonnes yokogo**



**Guwahati, May 10, 2026**

(Agencies): Baksa district nungi mezüngbuba ninang mojitzü indang international consignment May 9 nü Guwahati nungi United States-i yokogo.

Iba export ya Centre sorkar One District One Product (ODOP) initiative kübok Agricultural and Processed Food Products Export Development Authority ajanga yaritepa inyak.

Iba nung ninang mojitzü 20 metric tonnes jungnüa lir aser

APEDA-registered exporter Salt Range Foods Private Limited ajanga inyak ta sorkari metetdaksü.

Guwahati nung Commissioner and Secretary of the Agriculture Department aser Agriculture Production Commissioner Aruna Rajoria-i ninang mojitzü apusoa yok.

Iba ninang mojitzü ya Guwahati nung aliba Salt Range Foods' facility nung processed & packed asü ta ketdangsurtemi ashi.

Baksa district nung eco-

friendly aser pesticide-free environment nungi ninang mojitzü ya bendena liasü. Iba district nung anguba ninang mojitzü ya high quality aser near-organic characteristics atema tetshir.

Assam nung 2023-24 tsüngda ninang mojitzü 1,650 metric tonnes shi bendena liasü ta National Horticulture Board data nung ashir.

Assam nung ninang mojitzü kanga aika adokbaji Baksa, Kokrajhar, Chirang, Udalguri, aser Tamulpur district tem nung lir.

# DR Congo nung telungpurtemi nisung 69 tepset

**Kinshasa, Monupii/May 10 (Agencies):** Democratic Republic of the Congo (DRC) anotoktiplen mangatettep adoker aliba tesem nung telungpurtemi Ituri province nung nisung 69 tepsetogo.

DRC anütoklen mineral aika aliba iba tesem nung telungpurtem küm 30 dak tema iba tesem ya azüoktsü atema raratepa arudar.

Ituri nung Hema aser Lendu ta telungpur telok ana mapang talangka rara arudar. Iba province ya Uganda aser South Sudan na den arrtsü nung lir kong hon aika adoker.

Cooperative for the Development of the Congo (CODECO) den sendaka aliba telungpurtem shirnoki Lendu kümzüka toktsür ta shia

arudar, parnoki April 28 nü yimtsüing aika maka liasü, ta local aser security source balala ajanga AFP news agency dang ashi.

Convention for the Popular Revolution (CRP)-i Pimbo nung Congolese army (FARDC) tamendakdak ka amakba sülen anogo ishika lir tang iba tesem ya makogo. CODECO züingsemtemi April ita tatemlen nisung 70 dak tema tepseta liasü, ta Dieudonne Losa-i AFP dang ashi.

Security source anati iba tesem amakba jangjatsüogo. Tena rongnung kati ashiba agi, iba tesem nung telungpur aser sepai 19 densema nisung 69 tepsetogo.

CODECO züingsemtemi

iba tesem toktsür maoba ajanga tasümgangtem anogo aika monguteti liasü, ta parnokisa ashi.

Tasümgang 25 dang remogo, ta Losa-i Honibarnü ashiba den, tasümgang aika ano monguteti lir ta shisem.

Humanitarian source kati Bassa yimtsüing anasa tasümgangtem aika merephsia lir ta ashi.

DRC (MONUSCO) nung United Nations Organization Stabilization Mission-i April 30 nü ashiba agi, parnoki nisung 200 dak tema kümzüko.

Iba tesem nung ya cobalt, copper, uranium aser diamond adoker aser mapang talangka ochi mashi inyakyim aser azütokshi lendong balala agi timtema arudar.

## Mulungnen O



May 21, 1940 - April 23, 2026

Onoki teti meima aliba obala asür **Tsükjemsungba Longkumer** (Ungma), shirangdang aser iba alima toktsür aodang, ana aser talang nungi medemer, yimer-yimsanger, bendanger aser lokti balalatemü nubo, rongsen aser sarasadem agi nungita onok yariba atema kanga pelar.

Tsüingremi nenok ajak mameni moajangma.

~ Temeim Kinungtsü, Chirnurtem aser Semchirtem.

## REJOINER

### UNGMA ZOUBA SEMCHIR-i AITSÜR

Aoer Jamir Mungdang-i Ao Milen Adok No. 268 Monupii 8th 2026 Sl. No. 3, Longjakrep Semchir Tera (Lirem Kaket) dak ajemdaker, Yongshin dak Kümchu dang Jakzük ta koba kuli agüja lir, iba ya ozü Zouba Semchir Ungma ajanga aitsür.

Zouba Semchir-i Rajemtsür :- Zouba Semchir ya Yongshin Chir Kümchu tatong tenu lir. Ungma nung Kümchu dak Jakzük tempang nü ozü Zouba Semchir-i Kümchu senmang amang, aser iba kuli tejangja onok Zouba Semchir ket nung lir. Iba ken O angatetepnura ozü Zouba Semchir-i jembitsü mulonga lir.

Sd/- Wb. Supongmar Jamir (Tatar) Ungma Sd/- Wb. Lanunungsang Jamir (Tatar) Ungma

# Tanker ka Strait of Hormuz ajangogo, US-i Iran telangzüba atar

**Cairo, Monupii/May 10 (Agencies):** Iran nung rara tenzüker tang mezüingbuba Qatar indang natural gas tanker ka Deobarnü Strait of Hormuz ajango Pakistan leni ogo, aser US-i yimjung ken o jembi tenzüksü atema tang tesüsa proposals agütsüba nung Tehran-i langzütü ataa lir.

Taoba hopta mapang balala nung khatepa arur ghonda 48 shi süngjema aliba sülen Deobarnep Kuwait-i par anüing nung tsükchir indang drones kar putet, ta ketdangsür temi ashi.

Ajisüaka QatarEnergy meyong Al Kharaitiyat ya timtem majurui strait ajango aser Pakistan indang Port Qasim leni aor, ta shipping analytic firm Kpler ajango ashir, koba US aser Israel nati February 28 nü iba rara tenzüker Qatar meyong rong nung liquefied natural gas bener iba strait ajango aoba mezüingbuba alitsü.

Qatar aser Pakistan den temulung lemteptsü mechi Iran-i mela iba rong ya yok ta ashir, kechiaser totzü abenba lenmang tongtipang shibangba ajango Pakistan tesem aika nung power makai akum.

Ajisüaka US-i Iran nem temerenshi tenokdangba agüja aliba sülen anidakba linüktem nungi rong tem Strait ajango aoba nung timtem alitsü, ta Iran ketdangsür temi Deobarnü ashi.

Jembishinü metenzükdang rara tembangtsü atema proposal ka Tehran nem agütsüba nung United States tang tashi telangzüba ataa lir.

US Tir Donald Trump ya tan hopta China semdangtsü lir, aser rara anentsü asoshi lenla balala nungi ajungshir, koba ajango alima nung energy tebilemstü adokdaksü aser alima rongsenketzüing atema

tebilemstü lir. Tehran-i iba temesü Strait of Hormuz ajango Iran nung rong masürtem nokdanga arur. Rara metenzükdang iba strait ajango alima nung totzü shilem 20 shi belena liasü aser tang rara nung iba ya 'pressure points' tongtipang ka kumogo.

Iran-i iba strait ketdang asütsü atema bill ka yangluba mapang lir ta Iran nung ozüing yanglurtemi ashir, kong tsükchir linük indang rong tem nokdangtsü clauses dena lir.

Honibarnü U.S. Secretary of State Marco Rubio-i Miami nung Qatar Ato Kilonser Mohammed bin Abdulrahman al-Thani ajurua Middle East nung tensa tajungba kumdaktsütsü asoshi maneni külemi inyaksü nungdakba indang jembi, ta State Department-i sangdong ka nung ashi, saka Iran tenüing meliasü.

Ita ka tejakdang ceasefire tenzüka sülen iba strait telung aser temeket nung khatepa tawa-tanü tali liasü.

Kasa mapang Deobarnü US fighter jet ka Strait of Hormuz aser Gulf of Oman anüinglen yima aodang emergency sangdonga liasü. Iba tayimtsü ya Lockheed Martin F-35 Lightning II ka lir ta jangjatetogo, aser iba tayimtsü yagi squawk code 7700 osang yok - aser iba ya anüing nung ajungben timtem ajuruba tetetzü lir.

Tayimtsü ya UAE airspace leni oyaa liasü, ta FlightRadar data ajango ashir. Iba tayimtsü ya Gulf of Oman aser Oman anüinglen yima aoba tracking data ajango sayur. Ajisüaka kong nungi apuso, koleni aorba liasü aser iba tatalokba indang osang tejangja magütsü.

Tayimtsü ya UAE anasa aliba tsüingsü putet, aser iba sülen tayimtsü indang

transponder tammang akum, koba military operations mesüra ali nung anenba sülen yamaji asür.

Iranian state media-i iba jet ya IRGC sepaitemi khazüka yok mesüra khaogo ta ashir. Ajisüaka tayimtsü teraksa indang noksa mesüra osang tejangja melemsa.

Iba mesük taoba mapanga atalokba lir aser aiben Iran-i o soloka jembir mesüra tesülen tayimtsü raksar saka ngutetba indang alir.

Gulf nung anogo ishika khatepa aser tai tongloktsütepa aruba sülen iba ya ataloker. Deobarnep Qatar tzükumlen khu abenba rong ka amak ta ashir, kong Iran-i region nung 'US interests' nung tenük yoktsü ta tekumdangtsü shia lir.

Hokulbarnüa Gulf of Oman nung Iran nung nisan songa aliba tankers ana Iran leni aoba anendaktsütsü mechi US fighter jet kati raksatsü.

Honibarnü Iran indang Revolutionary Guards temi Iran nung tankers makra onoki Middle East nung US nung aliba tesem aser tsükchir rong tem amaktsü ta tekumdangtsü shia liasü.

"Iranian tankers aser commercial rong tem nung makra, onoki region nung American centres ka nung aser tsükchir rong tem dak kanga sashia amaktsü," ta IRGC ajango ashi.

United States aser par tembar linüktem tali tebilemstü kadaktsütsü nükjidong nung Iran-i Strait of Hormuz tang tesashiba alenbanga lir, koba alima nung totzü, gas aser fertilizer belenba lenmang tongtipang ka lir.

Kasa mapang US Navy-ia Iran den sendaktepa aliba rong tem nokdang, meyipa yoker mesüra raksatsür.

# Russia-Ukraine rara tatembang ka dangi arur ama bilemer: Putin



**Moscow, Monupii/May 9 (Agencies):** Russia tir Vladimir Putin-i ashiba agi, pai Ukraine den rara ya tatembang ka dangi arur ama bilemer.

Victory Day parade agiba mapang Ukraine nung parnoki takok angutsü ta nangzükba sülen ghonda ishika dang lir pai iba olen ya lemsatepa liasü.

"Ken o ya tatembang ka dangi arur ama bilemer," ta Putin-i osangbenertem dang Russia-Ukraine rara indang ya ashi. Iba rara ya World War II sülen Europe nung rara tamajungtiba lir. Paisa, Europe atema security dak sendakba nung inyakyim tasen benoktsü atema sensaksemstü mulunga lir, aser sensaksemstü atema taoba mapang Germany Chancellor Gerhard Schroeder aginer ta ashi.

2022 küm nungi Russia-i Ukraine amakba sülen Russia aser anüolen aliba linüktem tsüingda 1962 Cuban Missile Crisis sülen tang mangatettep tulutiba adoker lir.

Kremlin-i ashiba agi, U.S. tir Donald Trump indang administration teyongtsüi ia yimjung atema sensaksem ya khen atema anena lir. Kasa mapang nung Putin-i, Russia

nükjidong ajak matalok tashi maneni raratsü ta tenangzükba agütsüogo.

Rara adokdaksüba indang jembiba mapang Putin-i anüolen aliba linük lenirtem dak tai tongloktsü aser ashiba agi, parnoki 1989 küm Berlin Wall chirepba sülen NATO ya anütokleni atsülanga maotsü ta tenangzükba agütsü, saka Ukraine-a European Union küboki aitdaksütsü meranger.

Alima rara tanabuba nung Nazi Germany madak Soviet Union-i takok anguba anogomung May 9 nü amungba sülen ghonda ishika dang lir pai iba olen ya lemsatepa liasü. Kümshia amungba iba anogomung ya rara nung Soviet lisopur million 27 dak tema taküm samaba bilemteta amunger.

Russia nung sepaitemi Ukraine nung küm pezü dak tema rara arudar, koba Alima rara tanabuba dang nungi talangba lir.

Russia nung sepaitemi Ukraine anütoklen Donbas tesem ajungabo tang tashi matsüngteti lir. Russia-i tang tashi nung Ukraine indang litsü pongusü nung ka dang azüoka lir.

### NBA-i NE Elite Basketball League atema U19 tebur teamsangdongogo

**Dimapur, Monupii/May 10 (TYO):** Nagaland Basketball Association (NBA)-i May 9 nü Indoor Stadium, Medziphema nung U19 Boys State Trials takok ngua agiogo.

Iba Trial nung state kübok tesem balala nungi asayar 60 shi-i shilem agia parnok sempet, yimyayimpong aser basketball asayatsü jangraba sayuogo.

Asayartem kanga junga tendangba sülen asayar 15 shimogo aser parnok ya Aizwal nung May 18 nungi 20 tashi taruba Final Official Selection Trials aser Draft Picks nung Nagaland tenung nung oa asayatsü. Iba den bendenloksema ano asayar ana stand-bye asayar ama shimogo.

Selection trail nung shimba asayartem:

Kelhouletuo Khrabvü (PF),

Neikeduozo Seyie (PG), P. Guizingba Pampuinath (PG), K. Ruokuovilie Liezietsu (SG), Ediho Gideon Khizho (PG), Khüzhü O (SF), Thejakhriezo Sekhose (PG), Kevinguzo Belho (SF), Tokito K Swu (C), Renben C Shitri (PF), Hulupu Katty (SG), Sedevikuo David Kehie (PF), Mengusie Rino (SG), Dzuve Theluo (SG), Vitsosier Chusi (PF)

Stand-byes: Dzüte Wetsah (PG), Konmei P Leinak (SG).

Iba trail ya tajangshiba aika bener aliba selector panel kati shima liasü, kong Sentiningsang Longkumer, Xusheto Zhimomi, Salew Kadete, Chumbenthung Humtsoe, Neichutuo Rutsa, Thejangulie Mekro aser Seyievizo Kire nungerdensema lir.

National jenjang nung takongua asayatetsü atema asayartem shimtsü asoshi

ochishia aser tebandang kecha makai asayartem shimogo.

Kasa mapang nung Nagaland Basketball Association-i, Indoor Stadium amshitsü atema temelaba agütsüba atema Medziphema Administration dang kanga pelaba lemsatepogo. Parnoki teyari agütsüba ajanga trials takok ngua agiogo aser asayartem atema professional environment ka agütsütetogo, ta NBA-isa shisem.

Iba ya Nagaland nung basketball asaya atema alizüing tasen ka tongtetba lir, kechiyong asayartem ya Aizawl, Mizoram nung 2026 küm June 22 nungi July 2 tashi NE Elite Basketball League (U19) nung tokteptsü. NBA ya lanur asayartem anitetsü aser state nung sporting ecosystem takang ka amenoktsü atema bendanga agütsür lir.

### Sunil Chhetri-i ISL nung otsü tasen ka yangluogo



**Monupii/May 10, 2026 (Agencies):** India aser Bengaluru FC forward Sunil Chhetri-i Honibarnü otsü tasen ka yanglua pa ya Indian Super League puti otsü nung asaya kümogo. Jamshedpur FC den iba asaya ya par team-i goal 1-0 agi kokogo.

Asaya mezüngbuba shilem nung Ryan Williams-i minute 38buba nung goal ka idaktsüba agi par team-i asaya koka liasü. Asaya ya mapang talangba ka Jamshedpur puri amokbanger asaya saka parnoki goal magütsütet. Iba asaya nung arishi küm 41 tain Chhetri ya substitute ama asaya, aser pa minute 85buba nung Namgyal Bhutia menela ia asayaba sülen pa Indian Super League puti otsü nung asaya timtiba (195) asayar kümogo.

**Indian Super League nung asaya timtiba nung asayar aliba asayartem:**  
Sunil Chhetri: 195  
Amrinder Singh: 194  
Pritam Kotal: 194  
Rahul Bheke: 186  
Lallianzuala Chhangte: 179

Chhetri ya taoba küm international football asaya nungi anisüngzüikogo.

Jamshedpur madak takok anguba sülen Bengaluru pur-i asaya 12 nung point 20 ngua parnok Indian Super League nung pezüububai tuogo aser Jamshedpur pur (point 21) tasembuba nung temaba jenjang nung aliba East Bengal aser Mohun Bagan Super Giant na sülen lir.

Bengaluru puri asaya tetenzüklen goal idaktsütsü atema kanga nongshia asaya aser Jamshedpur defence pressure nung toktsü, saka Sarthak Golui aser Pratik Chaudhari nati kanga ajanga nokdaka liasü.

Iba sülen Jamshedpur puria asendenshir Madih Talal ajanga attack asü tenzüik. Pai Nikola Stankovi? aser Sanan Mohammed na den longjemer team asoshi goal idaktsütsüsa maongka yanglua asaya saka magütsütet.

Asaya nung Jamshedpur atema asaya mezüngbuba shilem nung Chaudhari-i goal ka idaktsü, saka pa offside liasü.

### Küm 44 sülen India nung Asian Weightlifting C'ships asayatsü

**Monupii/May 10, 2026 (Agencies):** Gandhinagar nung May 11 nungi 17 tashi Asian Weightlifting Championships ayongzüka asayatsü India renemdar. Küm 44 sülen tang mezüngbuba India nung iba asayamung asayatsü lir.

India nung weightlifter tem taküm küm tatemlen asayatsü aliba Commonwealth Games aser Asian Games nung asayatsü atema qualify asütsü merangba mapang tang iba asayamung asayatsü lir.

Asian Championships ajanga Olympic qualification cycle metenzük tsüingda India nung asayartem nem Asia nung temaba jenjang nung aliba asayartem den toktepa parnok tashi tendangtsü asoshi maongka agütsütsü. Olympic qualification cycle ya 2026 küm July ita nung tenzüiktsü aser 2028 küm May 7 nü tembangtsü.

Asayamung ya April 1 nungi 10 tashi asayatsü liasü, saka US aser Israel nati Iran amak tenzüka Middle East nung tensa mejungi akümba sülen thinentsüsa aküm.

Tejaoker Australia aser New Zealand na densema linük 30 nungi weightlifter 180-i taküm iba asayamung nung shilem agitsü.

Championships nung asayatsü aliba nungtugu asayartem rongnung China nung reigning Olympic champion Liu Huanhua densema lir. Pa den Qatar nung asayar 2020 Tokyo Olympics champion Fares Ibrahim El-Bakh-a asayaba angutsü.

Tetsürtem rongnung 2025 world champion aser 2024 Paris Olympics silver medallist Park Hye-jeong-i anir South Korea

team asayatsü aser North Korea nungia world champions Kang Hyon Gyong aser Ri Suk na asayatsü.

Ano Paris Olympics medallist Gor Minasyan aser China nung world champions Liao Guifang aser Chen Guanling nata iba asayamung nung asayaba angutsü.

Asia nung iba asaya ya China-i amokbanger asayar arudar aser parnok den ano

Kazakhstan, Uzbekistan, Iran aser North Korea nung amala team tashi taittemia asayamung nung kanga junga tokteptsü imlar.

India nung asayartem rongnungi Saikhom Mirabai Chanu yiruba ajang masayatetsü. Asayamung nung India nung weightlifter 16-i shilem agitsü koba China aser Sri Lanka na den asayar timtiba asayadaktsüba linük asütsü.

**Weight categories aser format:**  
**Tebur category tem:** 60kg, 65kg, 71kg, 79kg, 88kg, 98kg, 110kg, +110kg  
**Tetsür category:** 48kg, 53kg, 58kg, 63kg, 69kg, 77kg, 86kg, +86kg  
**Asayartem snatch aser clean & jerk naprongla nung asayatsü. (India squad) :**  
**Tetsür:** Komal Kohar - 48kg, Gyaneshwari Yadav - 53kg, Bindyarani Devi Sorokhaibam - 58kg, Nirupama Devi Seram - 63kg, Harjinder Kaur - 69kg, Sanjana - 77kg, Vanshita Verma - 86kg, Martina Devi Maibam - +86kg.  
**Tebur:** Rishikanta Singh Chanambam - 60kg, Raja Muthupandi - 65kg, Ajith Narayana - 71kg, Bedabrat Bharali - 79kg, Abhishek Suresh Nippane - 88kg, Parv Choudhary - 94kg, Harcharan Singh - 110kg, Lovepreet Singh - +110kg.

### Archery World Cup: India tetsür team-i gold medal angu

**Monupii/May 10, 2026 (Agencies):** Deobarnü Shanghai nung Archery World Cup Stage 2 final nung India tetsür recurve team-i shoot-off asayaba sülen China koka gold medal nguogo.

Deepika Kumari, Ankita Bhakat aser Kumkum Mohod nungeri iba asaya ya 5-4 agi kokogo. Decider asayaba mapang India team yagi 28-26 agi China team madak takok ngua liasü.

Iba asayamung semifinal nung India team yagi Olympic nung 10 ben tashi gold medal ngur aliba South Korea tsükdaktsü, aser 2021 küm sülen India tetsür recurve team kati tang mezüngbuba World Cup

nung gold medal nguogo.

Deepika atema iba takok ya la indang career nung alizüing tasen ka tongtetba asütsü. Olympics nung pezüben tashi asayar alila yagi 2010 küm nungi tang tashi nung World Cup team gold medal tenetbuba nguogo, aser iba ajanga Indian recurve archery nung la ya koda tongtibang aji sayur.

Chinese team nung Zhu Jingyi, Huang Yuwei aser Yu Qi nung den parnok pusemertem matsüingda asayaba mapang India team-i asaya kanga junga tenzüik aser mezüngbuba set 54-53 agi akok.

Ajisüaka tanabuba set nungbo China tsürtemi kanga junga asaya-a 2-2 ta kasasa

aküm. Iba asaya nung mimlai lia Deepika-i 7 nung khen akha.

Iba sülen tasembuba set ya-a China team-i koka parnok 4-2 agi tejakdang aküm.

Set pezüububa nunga India team-i junga masayatet aser Kumkum-i 7 nung khen akhaba sülen parnoki point 54 dang angu. Asaya akoktsü atema China team asoshi point 9 dang nungdaka aküm.

Ajisüaka arishi küm 18 tain Yu Qi-i pressure nung junga mekhateti point 8 dang angu aser iba ajanga India nem asaya

akoktsü atema maongka ka agütsü.

Deciding asayaba mapang Ankita-i 9 nung kha-a tenzüik, iba sülen Kumkum-i 10 nung akha aser Deepika-i point 9 ngua parnoki gold medal ngua liasü.

Shanghai nung India tebur team-ia medal anabo nguogo. Compound archer Sahil Jadhavi Honibarnü bronze medal ka nguogo. Kasa mapang nung Simranjeet Kaur-a iba asayamung nung medal angutsü timla lir.

**BILEMDANGANG**  
**"Tangar dang nungi yimya tajung angazükang, saka na ajak dang nungi balaka ta tamatok."**